

**CONVENIO DE COLABORACIÓN ENTRE A CONSELLERÍA DE CULTURA,
EDUCACIÓN E ORDENACIÓN UNIVERSITARIA E A REAL ACADEMIA GALEGA
PARA REGULAR O RÉXIME DE LIBRAMENTOS DE SUBVENCIÓNS NOMINATIVAS
CON CARGO AOS ORZAMENTOS DE 2018**

Santiago de Compostela, 22 de febreiro de 2018

REÚNENSE:

Don..., conselleiro de Cultura, Educación e Ordenación Universitaria, que actúa en virtude das facultades atribuídas no artigo 34 da Lei 1/1983, do 22 de febreiro, reguladora da Xunta e da súa Presidencia, modificada pola Lei 11/1988, do 20 de outubro e pola Lei 12/2007, do 27 de xullo, de acordo co seu nomeamento polo Decreto 148/2016, do 13 de novembro, e no uso das atribucións que lle confire o Decreto 4/2013, do 10 de xaneiro, publicado no DOG número 13, do 18 de xaneiro, no que se establece a estrutura orgánica da Consellería de Cultura, Educación e Ordenación Universitaria.

Don..., co NIF..., presidente da Real Academia Galega que actúa no seu nome e representación, de acordo co seu nomeamento que se acordou na xunta extraordinaria do 28 de marzo de 2017 e de acordo coas atribucións que lle confire o artigo 25 dos estatutos desta institución.

EXPOÑEN:

PRIMEIRO. Que a Consellería de Cultura, Educación e Ordenación Universitaria, a través da Secretaría Xeral de Política Lingüística, é o órgano da Administración xeral da Comunidade Autónoma de Galicia ao cal lle corresponde dirixir, planificar, coordinar e executar a política lingüística da Xunta de Galicia, así como programar e desenvolver medidas para o fomento do uso do idioma galego nos diferentes eidos sociais e económicos de Galicia co fin de incrementar a dispoñibilidade de produtos e servizos en galego.

SEGUNDO. Que o Decreto 373/2003, do 16 de outubro, sobre asunción por parte da Comunidade Autónoma de Galicia de funcións en materia de academias e a súa asignación a diversos departamentos da Xunta de Galicia, adscribe á Real Academia Galega á Consellería de Cultura e Turismo.

Segundo o Real decreto 271/2000, do 25 de febreiro, polo que se aproban os seus estatutos, a Real Academia Galega é unha institución científica que ten como obxectivo fundamental o estudo da cultura galega e especialmente a ilustración, defensa e promoción do idioma galego.

O seu artigo 2.º estipula as súas finalidades que son as seguintes:

- Establecer as normas referidas ao uso correcto da lingua galega, conforme o disposto na Lei 3/1983, do 15 de xuño, de normalización lingüística, do Parlamento de Galicia, nomeadamente: a elaboración da norma gramatical, ortográfica e fónica, o inventario do léxico e a proposta dun dicionario de uso e a modernización e actualización do léxico.
- Estudar e propoñer a restauración da onomástica galega.
- Velar polos dereitos do idioma galego.
- Defender e promover o idioma galego.
- Asesorar os poderes públicos e institucións sobre temas relacionados co uso correcto da lingua e coa súa promoción social.
- Estudar e dar a coñecer o patrimonio literario e documental da institución.
- Decidir a personalidade literaria á que cada ano se lle dedica o Día das Letras Galegas.

A Real Academia Galega levará a cabo, coa periodicidade que se estableza, sesións de traballo destinadas ao cumprimento destas finalidades.

TERCEIRO. Que ademais disto, a disposición adicional da Lei 3/1983, do 15 de xuño, de normalización lingüística establece que nas cuestións relativas á normativa, actualización e uso correcto da lingua galega se estimará como criterio de autoridade o que establece a Real Academia Galega.

En consecuencia, a Real Academia Galega ten a obriga de levar a cabo un traballo continuado de actualización e modernización da lingua galega co fin de satisfacer as novas necesidades expresivas que se derivan da vida moderna e ofrecer directrices para o uso correcto do idioma galego.

CUARTO. Que a Consellería de Cultura, Educación e Ordenación Universitaria (en diante a Consellería) e a Real Academia Galega desexan colaborar para fomentar e promover o uso da lingua galega, de acordo co disposto nas seguintes normas:

- a) A Constitución española establece no artigo 3.º que “as outras linguas españolas serán tamén oficiais nas respectivas comunidades autónomas de acordo cos seus estatutos”, ademais de recoñecer que as linguas de España son un patrimonio cultural que deberá ser obxecto de respecto e protección.
- b) En consonancia coa Constitución, o Estatuto de autonomía de Galicia no seu artigo 5 dispón que “a lingua propia de Galicia é o galego” e que “os poderes públicos de Galicia garantirán o uso normal e oficial dos dous idiomas e potenciarán o emprego do galego en todo os planos da vida pública, cultural e informativa”.
- c) A Lei 3/1983, de 15 de xuño, de normalización lingüística establece a obriga dos poderes públicos de Galicia de garantir o uso normal do galego e do castelán como linguas oficiais da Comunidade Autónoma galega. Así mesmo, establece que o galego, como lingua propia de Galicia, é lingua oficial das institucións da Comunidade Autónoma, da súa Administración, da Administración Local e das Entidades Públicas dependentes da Comunidade Autónoma.

QUINTO. Que nos capítulos IV e VII do estado de gastos do orzamento da Comunidade Autónoma para o ano 2018 figuran dúas subvencións nominativas a favor da Real Academia Galega por un importe total de cincocentos vinte mil euros (520.000,00 €), con cargo ás partidas orzamentarias 10.30.151A.481.1 para accións culturais e de investigación lingüística e 10.30.151A.781.0 para investimentos.

SEXTO. Que de acordo co artigo 26 da Lei de subvencións de Galicia, para o outorgamento desta subvención non é posible promover a concorrência pública, xa que no estado de gastos dos orzamentos para 2018 aparecen dúas dotacións nominativa a favor da Real Academia Galega.

Polo exposto, tendo en conta o artigo 47 da Lei 8/2017, do 26 de decembro, de orzamentos xerais da Comunidade Autónoma de Galicia para o ano 2018, formalízase o presente convenio para establecer os requisitos de concesión destas subvencións nominativas de acordo coas seguintes:

ESTIPULACIÓNS:

PRIMEIRA.- OBXECTO DO CONVENIO

Este convenio ten por obxecto instrumentar o réxime de libramentos das subvencións nominativas que figuran nos orzamentos xerais da Comunidade Autónoma de Galicia para o ano 2018 a favor da Real Academia Galega, conforme ao establecido no artigo 47 da Lei 8/2017, do 26 de decembro, de orzamentos xerais da Comunidade Autónoma de Galicia para o ano 2018.

SEGUNDA.- FINALIDADE

O obxecto desta subvención nominativa á Real Academia Galega é o financiamento de parte dos seus gastos correntes de funcionamento, así como a realización de investimentos e outros gastos de capital que lle orixine a realización dos proxectos e traballos que, dentro da súa programación anual, leve a cabo en materia de normalización do idioma galego de acordo co que establecen os seus estatutos.

TERCEIRA.- ACTUACIÓNS A DESENVOLVER

A Real Academia Galega comprométese a destinar as achegas económicas recibidas a través deste convenio a sufragar os gastos correntes e de investimento que se orixinen durante o ano 2018 como consecuencia da realización das seguintes actuacións:

- Proxectos e traballos de académicos e colaboradores da Sección de Literatura, Sección de Historia e Sección de Lingua na que funcionan os Seminarios de Gramática, Lexicografía, Onomástica, Sociolingüística e Terminoloxía galega.
- Galego sen fronteiras, cursos de lingua e cultura galegas para estranxeiros e españois de fóra de Galicia.
- Actividades culturais (homenaxes, efemérides, conferencias, presentacións, etc.), da Real Academia Galega e da Casa-Museo Emilia Pardo Bazán.

- Actos académicos.
- Día das Letras Galegas 2018, que se dedicará a María Victoria Moreno Marquez.
- Edición de publicacións da Real Academia Galega.
- Adquisición de publicacións, documentación e pezas para fornecer os fondos bibliográficos, arquivísticos e museísticos para consulta interna e acceso ao público en xeral nas súas instalacións
- Gastos necesarios para o seu funcionamento e equipamentos.

CUARTA.- OBRIGAS DA REAL ACADEMIA GALEGA

A Real Academia Galega comprométese a:

- Contratar os medios humanos, técnicos e materiais necesarios para o axeitado desenvolvemento dos traballos, de acordo coa lexislación de contratos do sector público, na medida na que resulte de aplicación.
- Executar, no prazo de vixencia deste convenio as actividades obxecto de subvención.
- Solicitar á Consellería de Cultura, Educación e Ordenación Universitaria os informes e autorizacións que sexan preceptivos das actuacións, así como de calquera modificación que xurda no seu desenvolvemento.
- A Real Academia Galega consinte expresamente a inclusión dos datos relevantes desta subvención nos rexistros públicos que proceda, de acordo co artigo 16 da Lei de Subvencións de Galicia.
- En todo o material gráfico, divulgativo e publicacións que se fagan relacionados coas actividades obxecto desta subvención farase constar, nun lugar destacado, o anagrama da imaxe corporativa da Xunta de Galicia como entidade financiadora.
- O beneficiario deberá dar cumprimento as obrigas de publicidade que se establecen no artigo 18 da Lei 38/2003, do 17 de novembro, xeral de subvencións, modificado polo artigo 30 da Lei estatal 15/2014, do 16 de setembro, de racionalización do sector público e outras medidas de reforma administrativa.

QUINTA.- FINANCIAMENTO E RÉXIME DE COMPATIBILIDADES

A Consellería de Cultura, Educación e Ordenación Universitaria da Xunta de Galicia contribuirá a financiar os gastos correntes e de investimento e outros de capital cun importe total de **cincocentos vinte mil euros (520.000,00 €)**, con cargo aos orzamentos xerais da Comunidade Autónoma para o ano 2018 coas seguintes contías por aplicación orzamentaria:

- Capítulo IV “Transferencias correntes”

Aplicación orzamentaria 10.30.151A.481.1

- Para accións culturais de investigación lingüística por importe de 475.000,00 €

- Capítulo VII “Transferencias de capital”

Aplicación orzamentaria 10.30.151A.781.0

- Para investimentos por importe de 45.000,00 €

A Consellería de Cultura, Educación e Ordenación Universitaria poderá realizar un pagamento anticipado ata un máximo de **60.100,00 €** con cargo á aplicación orzamentaria 10.30.151A.481.1 (ao abeiro do artigo 63 do Decreto 11/2009, do 8 de xaneiro, polo que se aproba o regulamento da lei 9/20079, do 13 de xuño, de subvencións de Galicia), previa presentación por parte da Real Academia Galega dunha memoria coa descrición das actividades que se van realizar durante o período de vixencia da subvención.

Posteriormente, a medida que se xustifiquen os gastos das actividades obxecto desta subvención, poderán levarse a cabo pagamentos parciais a conta da liquidación definitiva polo importe dos gastos xustificadas.

Esta axuda será compatible coa percepción doutras axudas para as mesmas actividades sempre que, illada ou en concorrencia con subvencións ou axudas doutras administracións públicas ou doutros entes públicos ou privados, non supere o 100% do custo das actividades que vai a desenvolver a beneficiaria.

SEXTA.- FORMA DE PAGAMENTO

O pagamento realizarase mediante libramentos parciais, a petición da Real Academia Galega e logo de que presente as correspondentes certificacións de gastos correntes e de capital nas que se acrediten os gastos executados con cargo aos seus respectivos orzamentos.

O pagamento efectuarase pola parte proporcional da contía da subvención que efectivamente se xustifique.

Cando se advirta un exceso de financiamento da actividade subvencionada, respecto do custo do proxecto, a Consellería de Cultura, Educación e Ordenación Universitaria efectuará a dedución polo importe total do exceso, ata o límite da subvención que se concedeu.

- Pagamentos a conta

Poderanse realizar pagamentos fraccionados a conta que non poderán superar, conxuntamente co anticipo concedido, o 80% do total da subvención e responderán ao ritmo de execución das actividades obxecto de subvención.

Aboaranse pola contía equivalente á xustificación que se presente e ata o seguinte límite por aplicación orzamentaria:

- 10.30.151A.481.1: 380.000,00 €
- 10.30.151A.781.0: 36.000,00 €

O pagamento do 20% restante da subvención non se efectuará ata que estean integramente xustificadas a totalidade dos gastos correspondentes ás actividades que se subvencionan incluíndo, no seu caso, o importe do anticipo a conta.

SÉTIMA.- XUSTIFICACIÓN DOS GASTOS

Documentación a presentar:

1. De conformidade co establecido na Lei 39/2015, do 1 de outubro, do procedemento administrativo común das administracións públicas, e no artigo 24.2 do Decreto 198/2010, do 2 de decembro, polo que se regula o desenvolvemento da Administración electrónica

na Xunta de Galicia e nas entidades dela dependentes, a documentación xustificativa presentarase electronicamente accedendo ao expediente na Carpeta do cidadán da persoa solicitante/representante, <https://sede.xunta.es/carpeta-do-cidadan>.

Para a presentación da documentación será necesario o documento nacional de identidade electrónico ou calquera dos certificados electrónicos recoñecidos pola sede da Xunta de Galicia, incluído o sistema de usuario e clave Chave365 (<https://sede.xunta.gal/chave365>).

Para a percepción de cada un dos pagamentos será necesario presentar orixinal ou copia compulsada da seguinte documentación:

- Unha memoria da actuación que xustifique o cumprimento das condicións impostas neste convenio, con indicación das actividades que se realizaron e dos resultados que se obtiveron.
- Unha memoria económica, asinada polo órgano competente da entidade, xustificativa do custo das actividades realizadas e que conterá:
 - Unha relación clasificada dos gastos e investimentos, segundo o modelo que se xunta como Anexo I.
 - As facturas ou documentos de valor probatorio equivalente no tráfico xurídico mercantil ou con eficacia administrativa.
 - Extractos ou certificacións bancarias acreditativos do pagamento das facturas que forman parte da conta xustificativa. No suposto de que o xustificante de pagamento inclúa varias facturas, deberase xuntar unha relación delas. Para gastos de escasa contía, por importes inferiores a 1.000,00€, a xustificación do pagamento poderá realizarse mediante “recibín” do proveedor, no que figure o seu nome ou razón social completo, DNI ou CIF e data de pagamento.
- Declaración responsable de que se cumpren todos os requisitos previstos no artigo 10 da Lei 9/2007, do 13 de xuño, de subvencións de Galicia, para obter a condición de beneficiario.
- Declaración de axudas percibidas ou solicitadas para este proxecto, na que se indique entidade concedente, data e importe total concedido, segundo o modelo que se xunta como Anexo II.
- No caso de edición de material gráfico achegaranse mostras impresas.

2. A documentación complementaria presentarase electronicamente, mediante a presentación do documento orixinal se se tratar dun documento dixital, ou da imaxe electrónica do documento orixinal se se tratar dun documento en papel.

Neste último caso, a imaxe electrónica adaptarase ao previsto do Real decreto 4/2010, do 8 de xaneiro, polo que se regula o Esquema nacional de interoperabilidade no ámbito da Administración electrónica, e na Resolución do 19 de xullo de 2011, da Secretaría de Estado para a Función Pública, pola que se aproba a Norma técnica de interoperabilidade de dixitalización de documentos.

As imaxes electrónicas aplicarán os formatos establecidos para ficheiros de imaxe na Norma técnica de interoperabilidade do catálogo de estándares; o nivel de resolución mínimo para imaxes electrónicas será de 200 píxeles por pulgada, tanto para as imaxes obtidas en branco e negro, cor ou escala de grises; a imaxe electrónica será fiel ao documento orixe (respectará a xeometría do documento orixe en tamaños e proporcións,

non conterá caracteres ou gráficos que non figurasen no documento de orixe e a súa xeración realizarase por un medio fotoeléctrico).

As imaxes electrónicas que presenten as entidades interesadas ao procedemento administrativo terán eficacia exclusivamente no ámbito da actividade das administracións públicas.

As imaxes electrónicas presentadas garantirán a fidelidade co orixinal baixo a responsabilidade da persoa solicitante ou representante. A Administración poderá requirir a exhibición do documento orixinal para o cotexo da copia electrónica presentada segundo o disposto na Lei 39/2015, do 1 de outubro, do procedemento administrativo común das administracións públicas, e no artigo 22.3 do Decreto 198/2010, do 2 de decembro, polo que se regula o desenvolvemento da Administración electrónica na Xunta de Galicia e nas entidades dela dependentes. Para estes efectos, a entidade interesada deberá conservar o documento orixinal por un prazo de 5 anos desde a presentación da imaxe electrónica.

No caso de que algún dos documentos que vai presentar a persoa solicitante de forma electrónica supere os tamaños límite establecidos pola sede electrónica, permitirase a presentación de forma presencial dentro dos prazos previstos. Para iso, e xunto co documento que se presenta, a persoa interesada deberá mencionar o código e o órgano responsable do procedemento, o número de expediente e o número ou código único de rexistro. Na sede electrónica da Xunta de Galicia publicarase a relación de formatos, protocolos e tamaño máximo admitido da documentación complementaria para cada procedemento.

Na sede electrónica encóntranse publicados os formatos admitidos para a presentación de documentación. Se o solicitante desexa presentar calquera documentación en formatos non admitidos, poderá realizalo de forma presencial a través de calquera dos rexistros habilitados. A persoa interesada deberá mencionar o código e o órgano responsable do procedemento, o número do expediente e o número ou código único de rexistro.

3. Antes de proceder á sinatura deste convenio e para o pagamento a RAG presentará na Consellería de Cultura, Educación e Ordenación Universitaria unha declaración responsable asinada polo órgano competente de non ter contraídas débedas, por ningún concepto, coa Administración pública da Comunidade Autónoma galega, así como de estar ao día das obrigas tributarias e ao corrente das obrigas sociais, de acordo co artigo 11 Lei 9/2007, do 13 de xuño, de subvencións de Galicia e artigo 11 do Decreto 11/2009, do 8 de xaneiro, polo que se aproba o regulamento da citada lei. Esta declaración poderá substituírse por:

- Certificación positiva expedida pola Tesourería Xeral da Seguridade Social correspondente, acreditativa de que a empresa se atopa ao corrente do cumprimento das súas obrigas coa Seguridade Social.
- Certificación positiva expedida pola Axencia Estatal da Administración Tributaria (AEAT) que acredita que a entidade se atopa ao corrente no cumprimento das súas obrigas tributarias.
- Certificación positiva expedida polo órgano competente da Consellería de Facenda (Xunta de Galicia) na que se teña constancia que non ten débedas pendentes de natureza tributaria coa facenda pública da Comunidade Autónoma de Galicia.

Non obstante, a sinatura deste convenio comportará a autorización ao órgano xestor para solicitar as certificacións que deban emitir a Axencia Estatal da Administración Tributaria, a Tesourería da Seguridade Social e a Consellería de Facenda da Xunta de Galicia.

Gastos subvencionables:

Considéranse subvencionables os gastos que respondan de xeito indubidable á natureza das actividades que se financien e que se realicen no período de vixencia da subvención. Serán admisibles os gastos orixinados dende o 1 de xaneiro do 2018 ata a data límite de vixencia da subvención.

Os tributos son gasto subvencionable cando o beneficiario da subvención os aboa efectivamente. En ningún caso se consideran gastos subvencionables os impostos indirectos cando sexan susceptibles de recuperación ou compensación, nin os impostos persoais sobre a renda.

De acordo co artigo 29.2 da Lei de subvencións de Galicia, considerarase gasto realizado o que foi efectivamente pagado con anterioridade á finalización do período de vixencia da subvención.

Cando o importe do gasto subvencionable supere as contías establecidas na vixente lexislación de contratos do sector público para o contrato menor, a entidade deberá de solicitar un mínimo de tres ofertas de diferentes provedores con carácter previo á contratación do compromiso para a obra, servizo ou subministración de que se trate, agás que polas súas especiais características non exista mercado suficiente de provedores ou que o gasto fose realizado con anterioridade á data de sinatura de concesión da subvención, o cal deberá de quedar acreditado na documentación xustificativa que se achegue para o percepción da axuda.

Para os meros efectos informativos da entidade beneficiaria o artigo 118 da Lei 9/2017, do 8 de novembro, de contratos do sector público, as contías que establece para o contrato menor, segundo a súa tipoloxía, son as seguintes:

- Obra: contía inferior a 40.000,00€, sen incluír o IVE.
- Subministracións ou servizos: contía inferior a 15.000,00€, sen incluír o IVE.

A RAG facilitará toda a información que lle sexa requirida pola Consellería de Cultura, Educación e Ordenación Universitaria, así como pola Intervención Xeral da Comunidade Autónoma, polo Consello de Contas e polo Tribunal de Contas no exercicio das súas funcións de fiscalización e control.

A falta de xustificación dos investimentos, dentro do prazo de vixencia do convenio, determinará a perda do dereito ao cobro total ou parcial da subvención de acordo co disposto nos artigos 54, 55 e 56 da vixente Lei de subvencións de Galicia.

OITAVA.- REXISTRO DE CONVENIOS. TRANSPARENCIA E BO GOBERNO

De conformidade co establecido no artigo 30 da Lei estatal 15/2014, do 16 de setembro, de racionalización do sector público e outras medidas de reforma administrativa, que introduciu diversas modificacións na Lei 38/2003, do 17 de novembro, xeral de subvencións, esta axuda será publicada na Base de Datos Nacional de Subvencións, nos termos recollidos no artigo 20 da Lei 38/2003, do 17 de novembro, xeral de subvencións, modificado polo artigo 30 da Lei estatal 15/2014, do 16 de setembro, de racionalización do sector público e outras medidas de reforma administrativa.

Así mesmo, a entidade asinante deberá dar cumprimento as obrigas de publicidade que se establecen no artigo 18 da Lei 38/2003, do 17 de novembro, xeral de subvencións, modificado polo artigo 30 da Lei estatal 15/2014, do 16 de setembro, de racionalización do sector público e outras medidas de reforma administrativa.

A sinatura deste convenio suporá o consentimento expreso da entidade á Administración para incluír e facer públicos os datos referidos ao convenio de conformidade co artigo 15 da Lei 1/2016, do 18 de xaneiro, de transparencia e bo goberno, co artigo 8 da Lei 19/2013, do 9 de decembro, (BOE 10-12-2013) de transparencia, acceso á información pública e bo goberno e co decreto 126/2006, do 20 de xullo, polo que se regula o rexistro de convenios da Xunta de Galicia.

Así mesmo, de acordo co establecido na disposición adicional primeira do Decreto 132/2006, do 27 de xullo, polo que se regulan os rexistros públicos creados nos artigos 44 e 45 da lei 7/2005, do 29 de decembro, de orzamentos xerais da Comunidade Autónoma de Galicia para o ano 2006, outorgase consentimento para que se publiquen as axudas concedidas, nos rexistros públicos referidos con expresión da entidade beneficiaria, a contía e a súa finalidade.

NOVENA.- DIFUSIÓN DA COLABORACIÓN DAS PARTES

Nas actuacións informativas e divulgativas e publicacións que se fagan relacionadas coas actividades deste convenio farase constar, nun lugar destacado, a colaboración da Consellería de Educación e Ordenación Universitaria - Secretaría Xeral de Política Lingüística e usaranse para iso, cando proceda, os anagramas aprobados pola normativa de imaxe corporativa da Xunta.

Sexa cal for o medio de difusión, cada unha das partes comprométese a facer mención da outra parte e deste convenio.

DÉCIMA.- VIXENCIA

Este convenio estará vixente dende a data da súa sinatura ata o 30 de decembro de 2018. Non obstante, este convenio poderá extinguirse por acordo mutuo e voluntario das partes, por desistencia dalgunha ou por denuncia do mesmo por incumprimento dos compromisos adquiridos, o que se comunicará de xeito fidedigno, previa audiencia da outra parte e con polo menos, un mes de antelación.

Abranguerá as accións obxecto do convenio que realice a entidade dende o 1 de xaneiro de 2018.

DÉCIMO PRIMEIRA.- COMISIÓN DE SEGUIMENTO

Coa finalidade de asegurar o cumprimento deste convenio, crearase unha comisión paritaria de seguimento, constituída por dous representantes da Secretaría Xeral de Política Lingüística, nomeados polo seu titular, e dous representantes da RAG. Esta comisión, que estará presidida por un dos representantes de Política Lingüística, coordinará o seu desenvolvemento e estará facultada para resolver cantas dúbidas xurdan na súa execución. Os acordos adoptados neste sentido serán inmediatamente executivos.

DÉCIMO SEGUNDA.- CAUSAS DE RESOLUCIÓN

Este convenio resolverase:

- a) Por incumprimento total ou parcial dalgunha das estipulacións que o regulan.
- b) Polo transcurso do tempo estipulado sen que se culminen as actividades acordadas.
- c) Pola aplicación dos fondos outorgados no convenio para fins distintos dos que motivaron a súa concesión.

De se resolver o convenio, a consellería de Cultura, Educación e Ordenación Universitaria pode, se é o caso, esixir a devolución das cantidades percibidas cos seus correspondentes xuros de mora..

DÉCIMO TERCEIRA.- RESPONSABILIDADE DAS ACTUACIÓNS

O asinamento deste convenio non implica relación laboral, contractual ou de calquera outro tipo entre os profesionais que vaian desenvolver as actividades previstas e mais a Xunta de Galicia, de tal xeito que a esta non se lle pode esixir responsabilidade ningunha –nin directa, nin indirecta, nin subsidiaria– polos actos ou feitos producidos no desenvolvemento do convenio.

DÉCIMO CUARTA.- NOTIFICACIÓN ELECTRÓNICA

Segundo o artigo 14.2 da Lei 39/2015, do 1 de outubro, do procedemento administrativo común das administracións públicas, os colectivos que están obrigados a relacionarse a través de medios electrónicos coas administracións públicas, e polo tanto, a recibir notificacións por canles electrónicas son: as persoas xurídicas, as entidades sen personalidade xurídica, os colexios profesionais, os que representen un interesado que estea obrigado a relacionarse electronicamente coa Administración e, os empregados das administracións públicas para os trámites que realicen con elas por razón da súa condición de empregado público.

As notificacións realizaranse só por medios electrónicos a través do Sistema de Notificación Electrónica de Galicia [Notific@, <https://notifica.xunta.gal>](mailto:Notific@xunta.gal). Para poder acceder a unha notificación electrónica, o interesado deberá contar cun certificado electrónico asociado ao NIF que figure como destinatario da notificación (persoa física ou xurídica). Así mesmo, o interesado pode autorizar a calquera outra persoa a acceder ao contido das súas notificacións.

DÉCIMO QUINTA.- NORMATIVA APLICABLE E XURISDICIÓN

Este convenio ten carácter administrativo e os seus efectos rexeranse polo establecido nas súas estipulacións, e quedará suxeito ao disposto nos artigos 47 e seguintes da Lei 40/2015, do 1 de outubro, do réxime xurídico do sector público.

O réxime xurídico aplicable a este convenio será o das seguintes normas: Lei 9/2007, do 13 de xuño, de subvencións de Galicia e Decreto 11/2009, do 8 de xaneiro, polo que se aproba o regulamento da citada lei, e Lei orzamentos xerais da Comunidade Autónoma de Galicia para o ano 2018.

Así mesmo, este convenio tamén estará suxeito aos artigos básicos da Lei 38/2003, do 17 de novembro, xeral de subvencións e do Real decreto 887/2006, polo que se aproba o regulamento da dita lei.

A xurisdición contencioso administrativa será a competente para dirimir as cuestións que puidesen xurdir da aplicación deste convenio.

Ao estaren as dúas partes conformes co pactado, asinan tres copias deste convenio no lugar e data anteriormente citados.

O conselleiro de Cultura, Educación e
Ordenación Universitaria

O presidente da Real Academia
Galega

MEMORIA ECONÓMICA DO CUSTO DAS ACTUACIÓNS

Don/dona: _____ con DNI/NIF: _____
en nome e representación da entidade _____
con CIF: _____

DECLARA:

Que os gastos que de seguido se relacionan, teñen relación directa coa subvención que lle concedeu a Consellería de Cultura, Educación e Ordenación Universitaria para

Acredor	N.º fra.	Data fra.	Importe	Data pagamento
Suma investimentos				

Lugar e data

Sinatura

**ANEXO II
DECLARACIÓN EXPRESA****DATOS DO DECLARANTE**

Nome: _____ Apelidos: _____

NIF: _____ Teléfono: _____ Fax: _____

Correo electrónico: _____

Enderezo a efectos de práctica de notificacións: _____

Entidade á que representa: _____

CIF: _____ Cargo: _____

DECLARO RESPONSABLEMENTE:

1 – Que para a seguinte actuación _____ a devandita entidade solicitou ou obtivo as axudas que se relacionan a continuación:

AXUDAS CONCEDIDAS:

ORGANISMOS	ANO	IMPORTE	DISPOSICIÓN REGULADORA

AXUDAS SOLICITADAS:

ORGANISMOS	ANO	IMPORTE	DISPOSICIÓN REGULADORA

Así mesmo, a entidade comprométese a comunicar inmediatamente cantas axudas solicite ou obteña para as mesmas actuacións doutras administracións públicas ou doutros entes públicos ou privados, nacionais ou internacionais, a partir da data desta declaración.

2 - Que a entidade á que represento non se atopa incurso en ningunha das prohibicións para obter a condición de beneficiario recollidas no artigo 10.2 da Lei 9/2007, do 13 de xuño, de subvencións de Galicia.

3 - Que a entidade a que represento, atópase ao corrente no cumprimento das obrigas tributarias coa facenda estatal e autonómica impostas polas disposicións vixentes.

4 - Que a entidade a que represento, atópase ao corrente no cumprimento das obrigas de Seguridade Social impostas polas disposicións vixentes.

☐ AUTORIZO á Secretaría Xeral de Política Lingüística para solicitar as certificacións que deban emitir a Axencia Estatal da Administración Tributaria, a Tesourería da Seguridade Social e a Consellería de Facenda da Xunta de Galicia.

Data da declaración:

(Sinatura e selo)